

Pauro Timoteo bo tapara ziwatahaka

Timoteo Pauro tuk zinymyrykyta, iwaze Pauro Timoteo zerikikze papeu ibo ziwatahaka. Hawa Sesus tuktsa nisipokzitsiki iwatahi ispirikpowy ibo ziwatahaka. Deus hyrikoso Pauro ziapewywy iwaze katsa kino niwatihi ana humo hi tanymyryky.

¹ Uta Pauro. Timoteo abo piwatahaka. Kiristu Sesus zikykhohik. Sesus Kiristu Deus tazo bo mymyoktyhyrykta niwatihi zikpehahiknaha iwatatu iakzohota my. Sihumo Deus wasania ty mopamykysoko. Katsa Sesus humo mspihikrētsa. ² Ikiakta katse wata. Iki katuk Sesus humo aspirikporēta. Deus pe my:

— O Deus kazo Timoteo humo tyzipokzitsikita iwatahi kytsa nasipokzitsi. O kazo Kiristu Sesus mypehatsa humo niwatihi ahahumo tsakurēta mykara — my.

Kytsa asahi tahaspirikpowy baratyty mynakaranaha asa bo hi — niwazuba pyktaha — tsimy.

³ Iki Epeso eze tsimytare. Nezeba Masedonia bo niukuruze ape:

— Iki Epeso eze tsimytare tsihikik iky. Abaka atsatu mykara Epeso tsimytare iwatahi asaktsa nisihyrinymyrykynahatsa asahi mybarapetu nikaranaha tysipehahik. Amy baratyty mysihyrinymyrykynaha. Deus harere batu

mysihyrinymyrykynaha tahaharere ty zuba kytsa bo mysihyrinymyrykynaha. Iwatahi ikia tysi-pehahik ispe tsimy:

“O meky watu tsimysihyrinymyrykynaha. Ni-wazuba pyktaha! Ahahyrinymyry byiziky tsimy.
⁴ Ahazotsa niakbakaranahatsa soho ty ka soso byitaha. Amy sinaro nikaranaha ana soho ty ka soso byitaha. Anatyhi tsimypamykysokonaha zeka kytsa Deus harere bo h̄y ahabyitsa. Tsimy-hapepehakanaha zuba. Deus mybo tsimysapyrēta ja mykaranaha, iwa motsasokonaha. Iwahatu ahazotsa harere ty ka soso byitaha” tsimy — my.

Iwa sibo tsimysasoko. ⁵ Iwa sibo tytsaso iwatsahi simypokzitsirētsa mynakaranaha. Simysapy-byitsa soho humo batu mytsaty mykaranaha zeka simypokzitsirētsa mykaranaha. Sesus humo mospirikpotohinaha zeka, kytsa humo simypokzitsiukrētsa mynakaranaha. Deus harere bo hȳy mykaranaha zeka iwaze kytsa humo simypokzitsirētsa. ⁶ Kytsa ahatukze kaharere humo batu siakparawy. Asahi batu wasani zikaha. Kytsa mekta ske buruk tu myzaranahaze tsa watsa moziknaha. Myzaranahatsa tihi:

— Hāta sa iske — maha, tsawatsa kytsa Deus soho mopamykysokonaha zuba. Hawa mospirikpo maha. Asahi saksoho humo piwaby-naha zuba ana humo hi siakparawy. ⁷ Asa kino kytsa mysihyrinymyry tsihikiknaha. Mahani. Moises harere ty mysihyrinymyrykynaha batu zikaha. Amy ty motsasokonaha ana humo hi batu sihyrinymyry. Batu wabyziuhu zikaha iwatsahi batu sihyrinymyry. Motsasokonahaze:

— Katsakta myhyrinymyrëtsa — asakta mybarapetu mykaranaha, iwatsahi waby waby byitaha.

⁸ Deus harere ana hi Moises ziwatahaka tisapyrëna my. Ana humo hi myhyrinymyrëtsa. Ana humo kino mytsaty tsimaha zeka wasani tsimaha. Ana humo hi hyÿ tsimaha zeka wasani tsimaha.

⁹ Iwahatu Deus harere ty Moises pe niy. Astatu Moises iharere ziwatahaka. Kytsa simysapybyitsa mykaranaha asa bo hi ziwatahaka. Kytsa batu simysapy asa bo hi ziwatahaka. Kytsa batu wasani mykaranaha asa bo hi ziwatahaka. Taparaka Deus harere ty sibo nyny niy. Kytsa iharere humo batu siakparawy. Kytsa mypehatsa harere bo batu yhy niaha. Kytsa Deus humo batu sispirikpo, asakta simysapybyitsa nikaranaha. Asahi tahazotsa nasibakanaha, usts a kytsa kino niwatihi nasibakanaha iwatahi sibo ziwatahaka. Taparaka Moises Deus harere ziwatahaka.

¹⁰ Kytsa usts okeza nasihuahuakanaha, wytykyryk kino niwatihi asizahi tahawakytikyryk pytsa batu iksa zuba zikaha. Kytsa naharapewowokonaha. Asahi jabyitsa nasiaksekenaha. Kytsa okyrysaro yksetsitsa sitsyhyryboarëtsa maha. Simyspihikbatanikitsa. Siharerewabymybarëtsa bo imysapybyitsa mykaranaha iwa asa kino zuba Deus harere ziwatahaka, ana humo hi hyÿ maha zeka tahamysapybyi pimoewynaha. ¹¹ Deus kape niy:

— Wasania ty tytsasokta! niy. Nanabyitaba kaharere tytsaso niy. Anaharere zuba motsasoko.

Ana pe wasani ty my. Deus imysapyrēnikita, ata zuba wasani mykara — niy.

Hawa Deus Pauro zipokzitsiki.

¹² Kiristu Sesus mypehatsa kape niy:

— O ikia zawatawy iwaze tsimysapyrēta tsimozik. Iwaze nanabyitaba kasoho wasani tsimytsasoko iwa katsyhyryze tarabajatykta tsipiktsumuēhĩ — niy.

Kyze Sesus tazikwy ty kabo nyny niy iwahatu isoho wasani motsasoko. Atahi kahumo tsimypokzitsiukrēta iwatahi kakurēta.

¹³ Taparaka ihumo batu kakparawy. Sesus tuktsa ziknasisukyryky, Sesus kino batu kakparawy. Deus batu kanyhy. Kaspirikpobyita hi batu kahyrinymyry. Atahi iwatahu mozikpokzitsiki. ¹⁴ Iwaze mypehatsa uta kahumo tsimypokzitsiarēta. Ihumo kaspirikporēta ikyzik. Abaka ustsā kytsa humo kamypokzitsiarēta ana humo hi zikyrinymyryky. Kiristu Sesus tuk tsinapykyryknahaze iwa tsimyzurukunaha.

¹⁵ Katsa hi:

— Sesus Kiristu mybarawy bo inasik. Kytsa simysapybyri humo izumu. Zumuze kytsa asahi tahamysapybyri pimoewynahaze asa kino Deus bo mysioktyhyryk nikara — iwa tsimytsasokonaha. Wasi my. Utakta kamysapybyita tu ikykara Deus Sesus humo zikyokzohik niy.

¹⁶ Sesus Kiristu kahumo tsimypokzitsiarēta. Mahani ziksininitsihikik. Iwatahi kahumo batu iakyri. Uta ihumo kaspirikporēta ana humo hi zikperyky. Zikperyky zeka ustsā bo niwatihi mysiperyky. Utakta kamysapybyita

ikykara kahumo ziperyky iwaze ustsá bo niwatihi taperyky. Deus ustsá pe:

— Pauro imysapybyita ziknakara. Utakta batu pimiwy kasopyk. Iwatahi mozipokzitsiki — niy. Aba kytsa Sesus humo batu sispirikpo kahumo Deus harere bo hyĩ maha. Hawa Deus kahumo isopyk asahi Sesus humo sispirikporẽtsa hĩ. Deus tuk mynapykyryknaha niwatihi. Mytuk ibaze mynapykyryknaha.

¹⁷ Iwaze Deus bo tsimypamykysokonahaktsa!

— O Deus ikia zuba tsamysapyrẽta hĩ. Aharere pykyhytuty tsiwabyziunaha. Tubabatu ikia taparaktsa pehatsa tsiky. Abaka katsa mypehatsa tsimozik. Mytsekokatsa pehatsa tsimozik niwatihi. Ikia zuba awahi koikny baktatu. Katsa abo ba zikozonaha. Ikia zuba awahi tsimynapykyryk batu aty tohi awata. Iwatsahi katsa abo ikia zuba abazubata tsimy, bijoikpe eze mybarawy eze kino niwatihi abazubata tsimy, ikia zuba wasani tsimykara — tsimaha.

Iwa tsimypamykysokonaha.

¹⁸ Iwaze Timoteo ikia katse wata. Iwatahi pahyrinymyry. Tubabatu Deus sohokotsitsa abo nitsasokonaha, siharere bo hi mytsatyzotyкта! Siharere bo mytsatyziu tsimy zeka Sesus humo tarabajziu tsimykara. Kytsa aharere humo tahamysapybyri pimoewykynaha. Iwahu ikia sodadu wata ikia hi amy ty isapybara tsipimoewyky. Hawa sodadu sisukyrytsitsa bo niwatsorokonaha ikia isapybara humo batu yhyĩ tsimykara.

¹⁹ Deus harere bo hyĩ tsimykara. Batu pyk ziky. Amy ty wasani my tsihyrinymyrẽta.

Atsatu tsimykara. Utsa kytsa usa wasaniha humo batu sihyrinymyry. Iwatsahi wasani ha humo batu yhỹ zikaha. Asahi Sesus humo batu sispirikpo. Tsaraha pihik bo moharazuk ezekta hyritywata. Sesus humo sispirikpobyitsa tu iwatsahi iharere humo batu ma zikaha. Hawa tsaraha niharazuk asahi Sesus humo sispirikpobyitsa ziknakaranaha.

²⁰ Situk tu makutsa petoktsa maha. Estuba Himeneu inarokota usta Aresādere inarokota. Iwaze ispe iky:

— Ikiahatsa Satanas harere bo yhỹ tsimykaranaha. Atahi za ahapehatsa mozik — iky. Iwa nitsasoko. Deus soho zisapybyrikinaha, kaharere humo mopyk tsihiknaha iwatahi iksibetsakak. Deus soho humo batu zikaha iwatahi iksibetsakak tozeka ja aibani Sesus humo mospirikpozonaha iwa mytsaty iky.

2

Hawa Deus bo tsimypamykysokonaha ana soho hi piwatahaka.

¹ Tapara ahape my:

— Deus bo typamykysonahaktsa! Myzubaha tsyhyryze Deus bo typamykysonahaktsa.

“O Deus tysitsumuēhīkī tsimaha. O myzo si-humo tsimypokzitsiarēta tsimaha. Ikia zuba wasani tsimykara” tsimykaranaha — iky.

Iwa ibo tsimypamykysonaha. Kytsa tsyhyryze Deus bo tyzapykykynahaktsa! Amy tisapyrēna anahi istsyhyryze tsimyzapykykynaha.

² Mypehatsitsa tsyhyryze Deus bo typamykysonahaktsa. Sihudikhudikwy

pehakatsitsa tsizubarēna tsyhyryze Deus bo typamykysonahaktsa. Iwa hi:

— O Deus mypehatsa myhumo simypokzit-siukrētsa hỹ. Iwatsahi mykurētsa tsimaha. Ba zikahapebetsaknaha kyzekta tsimykaranaha. Katsa mykurētsa zuba tsimoziknaha. Deus harere bo zuba hyỹ tsimykaranaha iwaze wasani tsimykaranaha — tsimaha. ³ Katsa tsimyharape pokzitsikinaha zeka Deus tsakurēta. Deus mymyoktyrykta my takino myhumo tsakurēta. Utsa kytsa kino niwatihi myharape pokzitsikinahaze tsakurēta hỹ. ⁴ Myzubaha Deus humo sispirikporētsa moziknaha ana hi mozihikik. Iharere wasani my kytsa iharere piwabynaha anahi mozihikik. Iharere bo hyỹ maha zeka sinini ykarawy bo ba zikmypeha. Iwahatu myzubaha iharere bo hyỹ maha mozihikik.

⁵ Iwatahi Deus babata ikaha tahi zuba. Kytsa simysapybyritsa humo takyriki. Iwaze Sesus Kiristu mytsapuhyripyrywyta mybarawy bo inasikze maku niyzik. Nihyrikosokda kytsa zibezenaha. Nihyrikosokdaze kytsa simysapybyitsa nikaranaha iwatsatu nisiokzo. Atahi mysapyzekenya nihyrikosokda ata zuba myhumo. ⁶ Iwatahi Sesus humo Deus ba ziktakyri. Iwa Sesus humo Deus kytsa ty batu ziktakyriwy. Deus wasaniha nitsaso tsihikikze Sesus nihyrikosokda naha soho nitsasoko. Sesus nihyrikosokda ana humo hi kytsa sihyrinymyrētsa. Deus bo mysioktyhyryk hỹ ana humo kino sihyrinymyrētsa. ⁷ Deus zikpeha kakzohota mozik. Iharere motsasoko

ana humo hi zikwatawy. Kytsa Sudeutsabyitsa mysihyrinymyryky sibo zikykhohik. Wasi my. Kamyspihikbatabyita mykara. Ata hi:

— “Ikiahatsa Sesus humo ahaspirikporētsa tsi-moziknaha” ispe tsimy iwa kape niy: “Iharere bo hyĩ tahaktsa kytsa” ispe tsimy: “Iwa kape” — niy. Iwa.

⁸ Iwaze abo motsasoko. Kytsa hudikhudikwy eze tu Deus bo typamykysonahaktsa. Izumubanahaze Deus bo mopamykysokonaha. Simysapyrētsa tahatsipatsa ty jobo bazuzu sisopyk iwa Deus bo mopamykysokonaha. Sibetsakokbyitsa Deus bo mopamykysokonaha. Siakyriukbyitsa kino niwatihi mopamykysokonaha. Izumubanahaze Deus bo mopamykysokonaha.

Wytykyryk Sesus humo sispirikporēza.

⁹ Wytykyryk kino niwatihi. Sesus humo sispirikporēza. Tahasuk ty korobyk mahaze sisapyrēza moziknaha. Sisuk wasani my zeka kytsa batu sibo iktsaziu zikaha. Siharadi meky watu batu mykaranaha iwatsahi kytsa sibo batu iktsaziu zikaha. Sinaha tisapyrēna. Sisuk tsipokzitsarēna ty batu korobyk zikaha. Sisuk tsiziurēna korobyk maha. Iwatsahi kytsa sihumo batu iktsaziu zikaha. Wytykyryk tahasuk soho bo batu mytsaty zikaha. Hawa sizubarētsa mysipokzitsinaha mytsaty maha. Ana bo hi mytsaty maha. ¹⁰ Wytykyryk motsasokonaha:

— O katsa za Sesus humo mospirikpoza tsimaha — maha. Asizahi pipokzitsikinaha zeka kytsa sisoho:

— O siza hi simysapyrēza hỹ — maha.

¹¹ Sesus tuktsa izumubanahaze wytykyryk tahabyri mopykyryknaha. Ahatuk ka soso byitaha:

— O katsaza myhyrinymybyiza iwazahi waby zuba — mykaranaha. Iwa soso byitaha. Asiza mypehatsa harere pinymyryknaha. ¹² Kytsa bo amy batu imysapybara ty ka isty spirikpo spirikpo byitaha! my. Iwa wytykyryk pe my. Asiza kytsa ba ziksipehanaha. Asiza pe my — Ikiahaka ahabyri ahakso byitaha — my.

¹³ Iwa asiza bo motsasoko. Tapara Deus Adão nizukni. Iwaze Ewa nizukni. ¹⁴ Hyrikoso sapybara pehatsa Satanas inarokota Adão bo mybarapetu niy. Wytyk zuba iharere humo yhỹ niy. Barapetu niyze atatsa iharere humo yhỹ niy. Atatsa hi tapara Deus harere bo batu ma niy. ¹⁵ Iwazahi simyitsapyrẽza. Ibykyhy mopurukze ky tsapyriwa. Siza Sesus humo mospirikponaha zeka tahahyrytsa tuk sakurẽza moziknaha. Utsa humo mysipokzitsikinaha zeka sakurẽza moziknaha. Tahasuk ty korobyk maha zeka ti-sapyrẽna mozurukunaha Deus asiza mysioktyhyryk. Tahamysapybyri pimoewynaha zeka Deus mysiokzo. Iwa hỹ.

3

Sesus tuktsa sispirikpokonahatsitsa soho motsasoko.

¹ Myspirikpowyhani baba wabytoktotaha! — Aty Sesus tuktsa pehakatsa zispirikpokota mozi-hikik zeka wasani my — my.

² Iwaze atakta bazimyi. Wasani mozuruku. Iwa zeka atakta estuba zubatatsa piakse. Batu paikpa

mytsaty ziky. Utsa harere piwabyziu. Kytsa iwahoro bo pomonahaze:

— O kawahoro bo pakutyny. Awanu tyhãity — my. Mypehakatsa Deus harere ty kytsa mysihyrinymyryziuku.

³ Kytsa opuwy tsõsĩ ba ziku. Kytsa ba ziksike. Ba ziktasakpare. Atahi kytsa humo tsimypokzitsiukrêta. Utsa kytsa okyrysaro ba ziakse.

⁴ Namyspirikpokotsa tahahyrytsa mysipokzitsiki. Tahyrytsa iharere bo ma mykaranaha. Tahyrytsa simysapyrêtsa maha. ⁵ Tahyrytsa humo imypokzitsi byizeka iwaze Sesus tuktsa humo kino niwatihi batu imypokzitsiuk. Tahyrytsa humo imypokzitsi byizeka Sesus tuktsa mozumubanahaze ba ziksipokzitsi batu ziky.

⁶ Maku Sesus humo abaka iharere bo yhỹ mykara batu mysipirikpokotsa zikyzik. Ata kino mypehakatsa Sesus tuktsa tuk batu ziwatawy. Mypehakatsa Sesus tuktsa tuk tsipiwatawy zeka batu imysapy my. Atahi mytsaty mykara:

— O uta mypehakatsa my. Kytsa kaharere ty mysipirikpo uta zuba wasani my zeka — my. Iwa mytsaty mykara. Tubabatu hyrikoso sapybara pehatsa Satanas inarokota atsatu mytsaty nikara.

— O uta zuba wasani my — nikara. Iwatahi Deus ipe niy:

— Batu ba. Ikia batu amysapy — niy. Iwaze Sesus humo isipirikpoziubyita mozik zeka Satanas wata mozik. Deus tihi — Ikia batu amysapy tsimy — niy.

⁷ Maku Sesus tuktsa namyspirikpota mozik zeka kytsa sizubarêtsa isoho humo piziukunaha. Asahi Sesus humo batu sisipirikpo mykaranaha:

— O atahi tsimysapyrêta iharere tsiwabyky-naha — maha. Kytsa sizubarêtsa iharere humo siakparawy byizeka tisukatsihikrêta mozik. Tisukatsihikrêta zeka jokaraharêta hyrity wata. Irara tawerykywy bo mynatsukze ba zikzoihik iakubyri mozumuze ta wata kytsa sizubarêtsa sispirikponahatsa soho zisapybyrikinahaze siakubyri mozumu niwatihi. Satanas werekywy hyrity wata bo mynatsuk. Iwatahi kytsa isoho tihi:

— O atahi tsimysapyrêta. Wasani my — maha. Iwaze isukatsihikbyita mozik.

Sesus tuktsa tsumuêhîtsitsa soho motsasoko.

⁸ Abaka Sesus tuktsa tsumuêhîtsitsa soho piwatahaka. Asahi sitsumuêhîtsitsa namyspirikpokotsa watsa mozurukunaha. Kytsa sisoho:

— O asaktsa simysapyrêtsa — maha. Sitsumuêhîtsitsa harere wasani mykaranaha. Ba zik mospihikbatanaha. Kytsa opuwy tsôsî ba ziku. Utsa kytsa namy ba zikzihiknaha. Okyrysaro ba zikzihitsa naha. ⁹ Taparaka kytsa Deus harere humo ka batu sihyrinymyry. Abaka sihyrinymyrêtsa. Deus sibo taharere nitsasoziuku, sitsumuêhîtsitsa harere humo sispirikporêtsa. Iwatsahi wasani mykaranaha mospirikpokonaha.

¹⁰ Tsikzumubanahaze sitsumuêhîtsitsa soho humo tsimypamykysokonaha. Ikiahatsa hi:

— O atahi wasani mozuruku ja tsimysapyrêta ja — tsimaha. Iwa tsimypamykysokonaha. Kytsa isoho humo yhÿ maha zeka tsimysapyrêta hÿ. Iwaze sitsumuêhîtsa mozik.

¹¹ Sitsumuēhĩtsitsa okeza kino niwatihi simys-apyrēza maha. Ba zikaha pisohonaha. Ba zikaha pimiyijanaha. Batu paikpa mytsaty zikykaranaha. Wasani mykaranaha. Wasape ha zuba motsasokonaha. ¹² Sitsumuēhĩtsitsa tasukza zeka wasani maha. Estuba zuba tatsa piakse, iokeza petokuruk zeka batu imysapy my. Maku petok okeza zeka ba ziwatawynaha. Sitsumuēhĩtsitsa hyrytsa siharere bo yhy mykaranaha. Iwahoro ezektsa sisopyk wasani mykara. ¹³ Sesus tuktsa nasitsumuēhĩkĩnaha zeka kytsa sisopyk tisapyrēna maha. Deus wasania ty ustsā kytsa bo motsasokonaha. Batu sisikpyby. Sisikpybybyitsa Deus wasania ty Sesus soho motsasokonaha.

Taparaka batu myhyrinymyry abaka myhyrinymyrētsa.

¹⁴ Aba Timoteo abo piwatahaka. Iwaze zuba abo mynakozore tsihikik. ¹⁵ Hawa my zeka aibani zuba abo mynakozore iwatahi papeu abo piwatahaka. Anapapeu humo iwatahaha tsipinyze hawa tsimyzuruku ana humo hi ahahyrinymyrētsa tsi-moziknaha. Deus tyryktsa mozumubanahaze Deus wahoro hyrity wata maha. Wahoro harakurukwy wata tyrikto niy ba ziknatsihyrikpetok. Iwa Deus tyryktsa iharere bo hyhy mykaranaha iharakurukwy watsa sipunihikrētsa moziknaha. Deus harere bo hyhy mykaranahaze ituk tahawahi mynapykyryknaha. Batu simyiwy sipunihikrētsa moziknaha.

¹⁶ Kytsa Sesus humo batu sispirikpo. Hawa kat-saktsa Sesus humo myspirikporētsa ana humo hi batu sihyrinymyry. Sihyrinymyrybyitsa tu Deus wasaniha ahabara ty sihumo tsihokdaharēna.

Abaka batu. Abaka katsa myhyrinymyrētsa. Abaka Sesus Kiristu sibo motsasoko. Sesus maku wata niyzik. Deus hyrikoso isoho hi:

— O ikia wasani my. Ikia zuba tsamysapyrēta — my.

Atakta bijoikpe iknyktsitsa Deus tsumuēhītsitsa ibo iktsa nikaranaha.

Sesus tuktsa usts bo mopamykysokonaha, kytsa nanabyitaba sizubarētsa bo mopamykysoikiknaha.

Sizubarētsa ihumo sispirikporētsa niyziknaha.

Deus ity zihyrizikpowyze ispitu niyzikzo bijoikpe bo nido.

Deus tuk mynadyhyky. Iwa hỹ.

4

Simyhyrinymyryziubyikitsa.

¹ Aiba tohi kytsa hyrikoso sapybara hyrity-watsa harere bo hyỹ mykaranaha. Asa soho hi ahabo motsasokonaha. Deus hyrikoso mybo botu nitsaso. Kytsa hyrikoso sapybara harere piwabykynaha, Deus hyrikoso mybo mypubara ty nipamykysoko. Iwahi:

— Bykyze wastuhu kytsa Sesus humo batu sispirikpo. Sesus zerekeknaha. Sesus soho humo nispiriktsokdanaha. Hyrikoso sapybara humo Sesus humo nispiriktsokdanaha. Hyrikoso sapybara harere bo zuba hyỹ mykaranaha. Asahi nisispihikbatakanahatsa harere humo yhỹ maha. Hyrikoso sapybara meky watu siharere ana humo hi mysihyrynymyrykynaha — niy.

² Simyspihikbatanikitsa. Hyrikoso sapybara hyritywatsa harere bo yhÿ mykaranaha. Asahi hyrikoso sapybara situk tsahi nispipihikbatakanaha. Nisimiwykynaha. Wasani ja mykaranaha batu sihyrinymyry. Batu imysapy ja batu sihyrinymyry. Paikpa mytsaty nikaranaha. Asahi siakbatsa watsa iwatsahi batu harere zikaha. Sihyritywatsa asahi batu tahapetu sisopyk. Iwatsahi wasani ja mykara batu sihyrinymyry, siakbatsa watsa. ³ Asahi mype nikaranaha:

— O ikia asukza byizeka wasani mykaranaha:
— mybarapetu sisopyk. Mydisahawy soho humo niwatihi mype maha:

— O ikiakta siraratsani ty hauk hauk byity!
— mybarapetu mykaranaha. Deus hi siraratsa ty mybo nyny niy. Myzohotsa ty nyny niy. Iwatahi siraratsa sizubarëtsa myhumo wasani my. Siraratsa sizubarëtsa tsimynasiborokonaha zeka wasani my. Ikiahatsa Sesus humo ahaspirikporëtsa iwatsahi siraratsa sizubarëtsa tsimynasiborokonaha. Ikiahatsa hi:

— O Deus ikia tsamysapyrëta ikia zuba mydisahawy ty mybo nyny tsiky — tsimykaranaha.

Iwaze mydisahawy ty haukbaiktaha myzohotsa kino niwatihi tahaborobaiknaha. ⁴ Deus suknihi ka wasaniha zuba. Iwatsahi nanabyity tsinamydisahakanaha. Iwatsahi mydisahabyitu Deus bo tsimypamykysanaha:

— O myzo ikia hi mydisahawy ty mybo nyny tsimykara. Ikia zuba tsamysapyrëta iwatsahi mykurëtsa — tsimaha. ⁵ Deus hi:

— Nanabyi nizukni wasani my. Kytsa bo wasani my — my. Mydisahawy ty tsimymydisahakanaha zeka Deus bo tsimypamykysokonaha:

— Ikia zuba tsamysapyrêta — ipe tsimaha. Iwatsahi mekywaha tu tsimymydisahakanaha.

Sesus Kiristu tsumuêhîtsa imysapyrênikita.

⁶ — O Timoteo hawa abo motsasokonaha ikia kino mytukytsa bo tytsaso. Hawa Sesus Kiristu tsumuêhîtsa tisapyrêna mykara. Atsatu tsimyt-sasoko — mykara. Iwaze tu ikia Sesus Kiristu tsumuêhîtsa babata tsimozik. Botu Sesus harere tsiwaby. Ana harere wasani my. Atsatu hyÿ tsimykara. Ikia kyry tsibik wata. Atahi taop-uwy pezukukze taypyk. Ikia Deus harere bo hyÿ tsimylkaraze tsahyrînymyrêta tsimozik. Kyry tsi-bik taopuwy humo tsakurêta mozik. Deus harere niwatihi zatsumuêhîkî. Mypowya waha. Ikia Deus harere bo hyÿ tsikykyara. Abaka niwatihi iharere bo hyÿ tsimykara. Iwa tsimyzuruku.

⁷ Kytsa siakbatsa harere soho ty motsasokonaha zeka waby waby byitaha. Anahi batu iakparawy my. Ana harere bo yhyÿ tsimy zeka Sesus harere humo ba hyÿ ziky. Iwatahi ana humo hi batu awabyhy. Ikia hi Deus hyrikoso iaksoho bo hyÿ tsimykara. Iwatatu Sesus humo tsimyspirikpo-tohi.

⁸ Ahanury humo ahapaikrêtsa zeka wasani my. Tsimyzibytuhukutu zeka Deus harere humo hyÿ tsimylkaranaha zeka wasani hyÿ tsimy. Iharere bo hyÿ tsimylkaranaha zeka wasani my iwa zeka tsimyzurukunaha. Bykyze tsimylkobabanaha zeka Deus tuk mywahi tsimynapykyryknaha. Ituk tsimynapykyryknaha

myspituza tsimaha. ⁹ Anaka iharere wasani hŷ. Ana humo hi tispirikporêta hŷ. ¹⁰ Iwatsahi tarabajaze tsimykarana. Katsaksa Sesus humo myspirikporêta. Sesus tawahi ispituzo atahumo kino myspirikporêta. Katsaksa itsyhyryze tatsumuêhîkî tsimykarana iwatsahi ustsâ kytsa Sesus humo sispirikporêta. Sesus humo mysispirikpokonaha iwatsahi tahatsumuêhîkîna tsimykarana. Deus kytsa sizubarêta mysioktyhyryk.

¹¹ O Timoteo ana humo kino kytsa tsihyrinymyry. Ana kino kytsa tsipehaka.

¹² Timoteo ikiakta apykyhyzytykta pykyhytuty. Ustsâ kytsa asoho ty batu tyso:

— O Timoteo mykyryburukta wata iharere ty batu tywaby — maha.

Iwa abo batu tyso. Ikia hi wasani tsimyzuruku. Kytsa Sesus humo sispirikporêta asahi tsiyokz-itsi. Ustsâ kytsa kino niwatihi tsiyokzitsiki. Tsimytsasozuiku. Deus humo aspirikporêta hŷ. Amysapybyi ty tsimykara zeka tsimoewyhyk. Ikia wasani tsimyzuruku iwaze tu ustsâ Sesus tuktsa awatsa mozurukunaha. Amy ty tsimykara siakparawy iwatsahi wasani mykarana niwatihi pasopykzukunaha.

¹³ Tsiykyrykyze abo mozumu papeu tsiyiny. Papeu Deus harere my. Ana papeu humo iwatahaha tsiyinykyze opykani tsimytsasoko iwaze hi Deus harere kytsa piwabyana. Asahi mozumubanaheze papeu humo iwatahaha tsiyinyze. Deus harere tsimytsasoko. Sesus harere ty tsihyrinymyrykykta: ¹⁴ Jatuba tu Deus tazikwy ty abo nyny niy. Tarabaja humo tazikwy ty abo

nyny niy. Deus sohokotsa ibo nitsasokonahaze iwa zuruze Deus tazikwy ty abo nyny niy. Sesus tuktsa nasispirikponahatsa tahatsyhyrypetsa ty aharek humo paik paik nikaranahaze, iwaze Deus tazikwy atuk nizapywy. Nasispirikponahatsa sopyk humo tahatsyhyrypetsa ty aharek humo paik paik nikaranaha. Iwa zuruze mytsatyzo tsimy. Iwa kytsa ahasopyk Deus hyrikoso humo nikaranaha. Abaka Deus zikwy atuk mynapykyryk.

¹⁵ Hawa motsasoko mytsatyziu tsimy! Iwa tsimyzuruku zeka kytsa asoho tihi:

— O Sesus harere bo hyĩ mykara. Pykyhytu iharere bo hyĩ mykara — maha. Iwa asoho ty mykaranaha.

¹⁶ Ikia tu pykyhytuty tsimykara. Hawa tsimysihyrinymyry pykyhytu tsimy. Iwa tsimysihyrinymyryky. Wasani tsimyzeka tsamysapyrêta tsimozik. Kytsa asahi pawabykynaha simysapyrêtsa moziknaha. Iwa isopyk zeka ikia Deus tuk awahi tynapykyryk. Kytsa asahi pawabykynaha asa kino niwatihi Deus tuk tahawahi mynapykyryknaha hỹ.

5

Hawa Sesus tuktsa ty tsimaha.

¹ Maku iktsaikbata imysapybyita mykara zeka betsak betsakbyity. Ituk tsimypamykysoko zuba

hawa imysapybyita mykara ana humo hi tsimypamykysoko. Azo wata humo tsinakara nahawa tihi. Kytsa siypykyzytyktsa bo tsimypamykysokoze atukytsa babatsa humo tsinakara naha wa.

² Wytykyryk sistsaikbaza simysapybyiza mykaranaha zeka asiza bo tsimypamykysokoze ajeza humo tsinakara naha wa tihi.

Sipyitsabyiza bo tsimypamykysoko zeka atukykyry babaza humo tsinakara naha wa tihi. Wytykyryk tsimypamykysokoze batu mytsaty ziky:

— O uta piaksetsihikik — tsimy. Iwa batu mytsaty tsimy. Ba ziksimyi.

³ Aba haramukukaka soho motsasoko. Hawa asiza tysitsumuēhīnaha motsasoko. Haramukukaka babaza.

⁴ Haramukukaka sihyrytsa sispitu zeka iwatsahi tahajeza bo mysisakihikynaha! Asahi tahajeza humo simypokzitsiukrētsa. Atatsa istiokatsa kino ipokzitsitsitsa moziknaha. Kytsa tatukytsa hi mysipokzitsikinaha wasani my. Deus niy:

— O kytsa tatukytsa humo mysipokzitsikinaha zeka wasani — niy: Tubabatu asahi tahahyrytsa nisipokzitsikinaha. Abaka sihyrytsa kino tahajeza mysipokzitsikinaha. Sihyrytsa tahajeza disahawy ty nyny mykaranaha. Isuk humo niwatihi ibo nyny mykaranaha!

⁵ Haramukukaka asiza zubaza atatsa Deus bo mopamykysoikik. Atatsa usts tsyhyryze Deus bo mopamykysoikik. Pibytuhukutu atatsa Deus bo myzapykyikik. Unata eze kino niwatihi atatsa Deus bo mopamykysoko. Atatsa Deus humo

tispirikporētatsa. Kytsa atatsa bo disahawy ty nynyntaha! Atatsa bo isuk ty nynyntaha tsimaha.

⁶ Haramukukaka atatsa zuba mytsaty mykara zeka batu tytsumuēhĩ. Asiza hi nawakyriki naha zuba ana humo hi mytsaty mykaranaha. Asizahi sispituze niakbakanahatsa waza batu wasani mykaranaha. Niakbakanahatsa ustsá batu isty tsumuēhĩ asiza ustsá batu isty tsumuēhĩ iwazahi niakbakanahatsa waza. Mymysapybyikinaha. Iwatsahi batu isty tsumuēhĩ. ⁷ Amy abo mot-sasoko atsatu sibo tsimytsasoko. Haramukukaka situkytsa bo. Iwatsahi kytsa sizubarētsa sisoho hi:

— O asiza siza wasani mokurunaha — maha. ⁸ Katsaktsa mytukytsa isty pokzitsiu byizeka batu mysapy tsimaha. Iwa tsimykurunaha zeka katsa Sesus humo batu mospirikpo. Katsa Sesus taereke iwata mytukytsa mysopyk zeka. Kytsa Sesus humo batu sispirikpo asahi situkytsa mysipokz-itsikinaha. Iwatsahi katsaktsa mytukytsa humo mypokzitsi byizeka katsa tu tsimysapybyikinaha.

⁹ Haramukukaka sizubarēza sinaro ty papeu humo batu tywataha. Sitsaikbaza zuba papeu humo tsipiwatahaka, asizahi humo Sesus tuktsa mysipokzitsikinaha. Iwatsahi sinaro ty papeu humo tsipiwatahaka. Sitsaikbaza sesēta anos zuba papeu humo tsipiwatahaka. Atatsa ibarikta estuba zubata zeka papeu humo tsipiwatahaka.

¹⁰ Ustsá kytsa sisoho mopamykysokonaha:

— O atatsa tsimysapyrētatsa. Nimysapywyky. Ihyrytsa kino iharere bo hyŷ mykaranaha. Batu pimiyiki. Kytsa iwahoro zumunahaze atatsahi: “Pakutyny niy. Tsikadisaha my papyrytsapik” my iwa mykara. Sudeutsa sopyk

ty kytsa mysipyrytsapikik. Zikbyituhukutu Deus tyryktsa mysitsumuēhĩkĩ, asahi mozurukunahaze tsihokdaharēnaze atatsa kytsa mysitsumuēhĩ. Utsa kytsa tsyhyryze mymysapywyky — maha. Iwa mozuruku. Atatsa kino papeu humo tsipiwatahaka, atatsa haramukuka babatatsa hỹ.

¹¹ Sitsaikbabyiza tu niharamukukakanahaza papeu humo tywataha wataha byitaha. Asiza siza mekta maku tuk. Kiristu tsyhyryze batu tarabaja zikaha. Maku mektatu piakse mykaranaha bo mytsaty mykara. ¹² Atatsa hi nitsasoko zeka:

— O batu kazeky niy. Kiristu tsyhyryze zuba tarabaja mykara — niy. Bykyze maku atatsa ziaксеhyryk. Iwaze kytsa atatsa soho:

— Atatsa nitsasoko “Kiristu tsyhyryze zuba tarabaja my niy.” Aba maku atatsa ziaксеhyryk. Kiristu tsyhyryze batu tarabaja nikara maha. Taharere ty batu hỹ niy — maha. ¹³ Haramukukaka sistsaikbabyiza mowakyririknaha zuba. Nipamykysoikiknaha zuba. Siharerewabymybarēza maha. Batu sipasaratsihik. Wahoro taba zuba paikpa mynapamykysoikiknaha. Imysapybara ty zuba mynatsasoikiknaha. ¹⁴ Iwazahi tahapytsazonaha maha. Sitsaikbabyiza tu tahapytsazonaha zeka jokboha mytsaty mykaranaha. Tahabykyhy-

nahaze. Tahabykyhytsa mysipupuruknahaze mysipokzitsinaha. Iwaze kytsa asahi Sesus tuktsa batu siakparawy sisoho batu siharerewabymybara. Mysukyrytsitsa haramukukaka soho batu siharerewabymybara.

¹⁵ Wastuhu haramukukaka botu Sesus harere bo

batu hŷ niaha. Ibaze zerekiknaha. Abaka Satanas harere bo yhŷ maha. Kaharere haramukuka soho tsipiwaby.

¹⁶ Iwaze wytykyryk Sesus tukykyryk iwa mozurukunaha. Atatsa itukytsa haramukuka zeka, atatsa kino haramukuka humo tsimypokzitsiarētatsa. Sesus tuktsa asahi mozumubanahaze atatsa humo batu ipokzitsi. Iwatsahi haramukukaka hi asizazubahaza mysipokzitsikinaha. Sesus tuktsa haramukukaka sibo zuba mysitsumuēhīkīnaha. Iwazahi haramukukaka sinamybyikiza tysitsumuēhīnaha.

¹⁷ — Mymyspirikpokotsa Sesus tuktsa tysitsumuēhīziukunahaktsa! kytsa. Ahanamy ty sibo nynytaahaktsa, ahadisahawy ty sibo nynytaahaktsa! Sesus tuktsa mysitsumuēhīziukunaha zeka nynytohitaha! Asahi Sesus harere ty mymyhyrinymyrykynaha zeka asa kino ahanamy ty sibo nynytohitaha. Siharere tsiwabyziukunaha — my. ¹⁸ Iwa ikiahatsa ahasopyk. Deus harere botu ziwatahaka. Moises Deus harere botu ziwatahaka:

— Ahararatsa ahatsyhyryze tarabaja mykaranaha zeka isty sakiwara sakiwara byitaha iwatsahi tadisahanaha. Ahararatsa ty pahatsumuēhīnaha zeka mytadisahanaha — my. Usta papeu Deus harere tihi:

— Aty atsyhyryze pahatsumuēhīkī anamy ty ibo nynytykta! Wasani my. Iwatsahi nasipirikponahatsa Sesus tuktsa ahanamy ty sibo nynytaahaktsa. Sesus tuktsa sizubarētsa tahanamy ty nasipirikponahatsa bo nynytaahaktsa! — tsimaha.

19 — Estuba maku Sesus tuktsa myspirikpokotsa soho tsiharerewabymybarêta zeka ba ziwaby. Atahi:

“O myspirikpokotsa imysapybyita nikara” my. Ana kino ba ziwaby. Kytsa petoktsa myspirikpokotsa soho motsasokonaha zeka:

“O imysapybyita nikara” maha. Wabytahaktsa. Kytsa harakykbyihi myspirikpokotsa soho motsasokonaha zeka:

“O myspirikpokotsa imysapybyita nikara” maha. Asa kino wabyziutaha tsimy — my. 20 Myspirikpokotsa Sesus tuktsa pisapybyi zeka myzubaha okzetu tsibetsakaknaha. Imysapy byizeka batu pykzeky iwaze kytsa sizubarêtsa okze tu tsibetsakik. Ibo tsipibetsak zeka usts a myspirikpokotsa sipybyrêtsa maha:

— O katsa kino niwatihi tabetsakiknaha — maha. Iwatsahi sipybyrêtsa. Imysapybyitsa mykaranaha humo sisikpybyrêtsa.

21 O Timoteo kaharere bo hyÿ tykta! Ana hi papehaka atsa tyty tsimy. Deus kaharere piwabyky Sesus Kiristu niwatihi kaharere piwabyky. Bi-joikpe iknyktsa asahi Deus nisiwatawyky kaharere piwabykynaha, sizubarêtsa kaharere piwabykynaha ape ikykara naha ty piwabykynaha. Iwatahi myspirikpokotsa atsawatu asopyk. Ba ziktsaso:

— O atakta maku kaharereziuw y kapokzitsik-itsa ihumo batu kasakpare. Usta maku imysapy byita zeka tsipibetsak! — my. 22 Maku myspirikpokotsa mozikze atsyhyrypetsa ty iharek humo paik tsimy. Iwa tsimy mysopyk ty zuba. Pykyhytuty. Ikia ahyrizik watuty atsyhyrypetsa

ty maku harek humo paik tsimy. Utsa kytsa simysapybyitsa mykaranaha zeka ikia batu. Ba situk zikasapy. Atazuba mozik zeka bazimy. Tsimysapyrêta tsimozik.

²³ O Timoteo pihik baba ty zuba ba tsõ tsimy. Ahakuki tsapyri myzibytuhukutu iwatahi duabohotsa tsik tsipiku. Myhakoki hwi waha duabohotsa tsik ty tsõ tsimyze iwaze ahakuki jokboha mozik.

²⁴ Wastuhu kytsa sizubarêtsa okzeka pisapybyikinaha. Kytsa sizubarêtsa simysapybyitsa nikaranaha ana soho humo sihyrinymyrêtsa. Deus mysisininiwyky ana humo hi sihyrinymyrêtsa. Utsa kytsa pisapybyikinahaze kytsa papatu mykaranaha iwaze kytsa simysapybyitsa mykaranaha soho humo batu sihyrinymyry. Aibani zuba kytsa simysapybyitsa nikaranaha soho humo sihyrinymyrêtsa. ²⁵ Iwaze wastuhu kytsa sizubarêtsa okzeka simysapyrêtsa nikaranaha. Kytsa sizubarêtsa amy tisapyrêna maha ana soho humo sihyrinymyrêtsa. Utsa kytsa simysapyrêtsa mykaranahaze kytsa papatu mykaranaha. Tisapyrêna hi piokpitsikînahaha. Abaka batu aty tohi hawa simysapyrêtsa mykaranaha sihyrinymyrêtsa. Aibani zuba kytsa hawa tisapyrêna nikaranaha ana soho humo sihyrinymyrêtsa hỹ.

6

¹ Sesus tuktsa asahi mysitsumuêhîkînahaha okyrysaro perykytsa batu sibo nyny ziky. Iwatsa tu nisitsumuêhîkînahaha zuba. Asahi maku sitsihitsa

wasani sisopyk maha iwa sihumo tsimy. Iwa ihumo sisopyk zeka kytsa Sesus humo batu sispirikpo.

— O Deus harere bo wasani my — mykaranaha, ahahumo Deus harere bo wasani my mykaranaha. Myhyrinymyrywy batu amy tohi siharerewabymybara maha. Iwa sihumo tsimy. ² Wastuhu Sesus tuktsa tahatukytsa humo nisitsumuēhĩkĩnaha. Utsa Sesus tuktsa sihumo sitsihitsa niyziknaha. Iwatsahi batu tyso:

— O atakta Sesus tukta niwatihi. Iwatahi iharere bo batu hỹ — my. Iwa batu tyso. Ikia ispe tsimy:

— Asa bo hi tysitsumuēhĩnahaktsa Sesus tukta niwatihi iwata tu tsitsumuēhĩnaha. Ata maku Sesus humo tsimypokzitsiarēta iwatsahi tsitsumuēhĩnaha — tsimy. Timoteo ana humo hi tsihyrinymyryky. Sesus tuktsa tsihyrinymyryky:

— Tsisapybakanahaktsa! tsimy. Iwa tsimyzurukunaha tsimy. Sesus humo tsimypokzitsiarēta iwatahi tytsumuēhĩnahaktsa! — tsimy.

Iwa tsimyzurukunaha.

Sesus spirikpowy tsihyrinymyrykta.

³ Sesus Kiristu mypehakatsa iharere wasani my. Aty iharere bo hỹ my zeka Deus hi:

— O atakta tsimysapyrēta — my. Aty tohi meky watu msihyrinymyryky zeka Sesus harere humo batu ihyrinymyry. Iharere batu iakparawy.

⁴ — Katsa zuba myhyrinymyrētsa tsimaha — maha. Mahani ba. Sihyrynymyrybyitsa tu sisopyk. Myharapepehakanaha zuba. Sizokdirētsa. Mopamykysoikiknaha zuba. Siharerewabymybarētsa maha. Utsa kytsa

soho humo myharape ziubyikinaha. Iwazeka simytsatyharëtsa moziknaha. ⁵ Kytsa tuk mopamykysoikiknaha zuba. Sesus Kiristu harere batu siakparawy. Iharere pimyikinaha. Iwa mytsaty mykaranaha.

— Katsa Deus humo tsimyspirikponaha zeka mynamyrëtsa tsimoziknaha — mytsaty ahaby-itsa zikaha. Iwa tahape tu sisopyk mybarapetu mykaranaha. ⁶ Sesus tukta tsinamyrëta wata. Deus humo tsinamyrëta wata. Mynamyrëtsa zeka mydikrëtsa. Mynamy tsikaeni zikino mydikrëtsa. Deus mytuk mynapykyk iwatsahi mykurëtsa. Takino tsimysapyrëta hỹ. ⁷ Katsa tsikpupuruknahaze batu mynamykyryk. Iwa tsimyhyrikosokdanahaze batu amy tohi ty mytuk wabehyryk zikaha. Katsa zuba Sesus mymyoktyhyryk. ⁸ Iwatsahi mykurëtsa. Katsa mydisahawy mysuk iwaha humo mykurëtsa. ⁹ Kytsa tihi:

— O kanamy tsizubarëna zeka kakparawy, okyrysarowaka kino niwatihi kakparawy. Kanamyrëta mozik hỹ — my. Asahi okyrysaromysisapybyikinaha. Amo batu sapy my okyrysarosoho humo mykaranaha. Asahi siraratsa watsa maha. Sirara tsaraparëta zeka tawerykywy bo mynatsuk. Anaeze mora. Iwa maku tahi:

— O uta kanamyrëta hỹ — my ta kino okyrysarohumo amy ty imysapybyitsa mykara. Bykyze tisukatsihikrëta mozik. Sinini ykarawy bo ba zikzoizo. Hawa siraratsa tawerykywy bo ba zikzoik atahi sinini ykarawy eze ba zikzoik. Deus tuk ba ziktasapy. ¹⁰ Asahi okyrysarohumomysapybyitsa mykaranaha. Asahi okyrysarosiakparawy iwatsahi Sesus humo batu sispirikpo.

Sesus soho humo nispiriktsokdanaha. Okyrysaro tsizubarēna ziaксеkenaha. Sisukatsihikrētsa nikaranaha. Sispirikpobyitsa tu sisukatsihikrētsa nikaranaha.

Abaka Timoteo ikia bo zuba motsasoko.

¹¹ O Timoteo ikia hi Sesus tukta babata tsimy. Iwatahi amo imysapybara humo tsmoewykta! Wasani tsimyzuruku. Deus harere bo hyỹ tsimykara. Deus humo tispirikpoziurēta. Utsa kytsa tysipokzitsikikta. Kytsa humo batu apyby. Sinini tsimykara zeka tsapunihikrēta tsmozik. Batu tyso!

— O uta zuba myhyrizikwanita — iwa batu tyso. Utsa kytsa harere bo wabyziuty. ¹² Timoteo Sesus humo tispirikpoziurēta tsimyкта! Kytsa asahi motururukiknahatsa watsa. Sipaikrētsa moziknaha. Ikia siwata tsmozik. Ikia Deus bo zuba mytsaty tsimykara hawa kytsa motururuknaha iwaze aty tapara pomo tawata. Ikia hi Sesus humo tsaspirikporēta babata iwatahi tsapunihikrēta tsmozik. Sesus humo tsaspirikporēta hỹ. Tsimyhyrikosokda zeka Deus tuk awahi tsimynapykyryk. Ikia kytsa sizubarētsa okze botu nitsasoko:

— O utakta Sesus harere humo mospirikpoko — tsiky. Iwa kytsa okze tsiktsasoko. Iwaze Deus zawatawy. ¹³⁻¹⁴ Sesus Kiristu harere bo hyỹ tsimyкта! Iwaze batu amysapybyita tsimykara. Sesus asoho humo batu amysapyziky. Sesus harere humo zuba tsimyzuruku, mekywaha myharere bo ka ba yhỹ tsimy. Sesus Kiristu myziksizoze mymyoktyhyryk. Atahi tsipiperykyze wasani tsimyzuruku. Ana

hi motsasoko, Deus okze tu abo motsasoko. Sesus Kiristu okze tu niwatihi abo motsasoko. Deus kino kytsa abazubatsa ihumo sispitu. Siraratsa sisarakatsa kino niwatihi ihumo sispitu. Sipehakatsa niwatihi ihumo sispitu. Iwaze Sesus Kiristu tsipunihikrêta batu ipyby. Sipehatsa Pôtios Piratus iokeryk tu amy ty wasani my atsatu nikara. Batu ipokso ipybybyita ziknakara wasapeha ty zuba nikara.

¹⁵ Deus mozihikik zeka Sesus mybo myzipeha iwa mybo myziksizo. Deus tsimysapyrêta mykara. Atahi zuba abazubata. Utsa pehatsa iharere bo hyĩ mykaranaha. Ata pehatsa kino myhyrizikwani my. Deus zuba mytsihitsa kytsa sizubarêtsa humo sitsihitsa my.

¹⁶ Katsa tsimyhyrikosokdanaha. Deus koikny baktatu. Tawahi mynapykyryk. Amy skaraba tisapyrêna ihumo zuba tisapyrêna. Isapy haramwe jekwaha humo tisapyrêna. Haramwe bo iktsa tsimy zeka batu isapy iwa zeka ihumo tisapyrêna zuba motare. Iwaze katsaktsa ituk ahabyi zeka hawa haramwe bo batu iktsa tsimaha katsa mymysapybyri humo ba ibo iktsa tsimaha. Katsa batu ibo iktsa zikaha. Mysapybyitsa tsimykaranaha zeka ba ituk tsimynapykyryknaha. Katsaktsa iharere bo hyĩ tsimahaze mekywatsa tu tsimoziknaha. Ihumo ahamysapyrêtsa tsimoziknaha iwatsahi iharere bo hyĩ tsimahaktsa kytsa! tsimaha. Iwatsahi katsa tihi:

— O Deus ikia zuba wasani tsimykara. Ikia zuba tsamysapyrêta. Myhyrizikwanita awahi tsimynapykyryk. Azikwy kino niwatihi atuk

awahi mynapykyryk — tsimaha. Iwa ibo tsimypamykysokonahaktsa kytsa.

¹⁷ Timoteo Sesus tuktsa asahi sinamynikitsa pe tsimy:

— O sinamynikitsa batu tyso “O katsa zuba myhyrizikwanitsa tsimaha.” Ahanamy byizeka sa hawa tsimaha Ahanamy humo tsikaeni zuba ahakparawy zeka. Deus humo tuspirikpokonahaktsa! Atahi mynamykusukniki. Amo wasani my anaty hi mybo nyny my — tsimy.

Iwa sibo tsimy:

¹⁸ — Utsa kytsa tysipokzitsikinahaktsa. Sibo tsisapybanahaktsa! Ahanamy utsa bo tsibiaakannahaktsa! Iwa sinamynikitsa bo tsimypamykyso.

¹⁹ Ahanamy ty nyny tsimaha zeka, usa ahanamy ka Deus baze tu mynapykyryk. Ahanamy mekywaha tu Deus baze tu maha, anaeze tawahi ahanamy mynapykyk. Iwaze ikiahatsa Deus tuk ahawahi tsimynapykyryknaha hỹ — tsimy.

Iwa Timoteo ikia sinamynikitsa bo tsimytsaso.

Aba nepyk.

²⁰ — O Timoteo Deus harere bo hyỹ tsimykarakta! Pykyhytuty iharere bo hyỹ tsimyкта! — my. Kytsa asahi Deus harere humo batu siakparawy sibo batu motsaso. Tsikaeni zuba sibo tsimypamykysoko. Siharerewabymybarẽtsa maha. Asa hi:

— Katsa zuba myhyrinymyrẽtsa — mybarapetu mykaranaha. Situk ba zikmysapynaha. ²¹ Kytsa siharere piwabykynahaze sibo yhỹ mykaranaha. Iwatsahi Sesus humo batu sispirikpo. Sesus zerekiknaha siharere humo. Iwa my.

Deus pahasapywyky.

Aba ikia pe Deus kino ahumo tsimypokzitsiarêta Sesus tuktsa sihumo mysipokzitsihiki niwatihi. De.

Pauro

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

2f0260ea-5969-5180-9ac5-183d63a989f1